

# SAN PABLO KARTA E'SU FXI'JNI KORINTO ÇXHABTEWE'SX JÏ

Dxus yakh fxi'zesatx Pablo fxi'jni

**1** <sup>1</sup> Jesukristo jxkaahnisa Pablo yaaseth, txã'wë yüuwa'ja's Dxusku jxthâas txãa pa'ga. Naa karta's yakhthê'j Timoteo yakh fxi'jçxa kajaçthu Dxus luuçx Korinto çxhabte pkhaakhena üssawe'sxtxi. Sa' txãawe'sxtxiçxáa méé, Akaya kiwesuwe'sx Dxus luuçx jxukaysawe'sx jïi yã'lçxa fxi'jaçthu weçxana. <sup>2</sup>I'kwe'sxtxi' Dxus kwe'sx tata' pu'çxhina vxite' kwe'sxtxi jxpe'jsa Jesukristowa, txãa pa'ga Dxus yakhçxáa mfxi'zewe.

Pablo pxthaa nxuste fxi'zeni

<sup>3</sup>Ãçxha' Dxusa's wala weçxawa'j ji'ptha'w, txã' kwe'sxtxi jxpe'jsa Jesukristo Tata', txãasak kwe'sxtxi's peeygãhçxa bagaçxtewa kvxiisxa'jna nes yu'. <sup>4</sup>Kwe'sxtxi' kïjkïh nxuswa'j en pa'thewa, kvxiisxa'ja'k Dxusa', açã' txãa ma'wëga kwe'sxtxi's kvxiisxa'j, txã'wëy kwe'sxwa vxitesa nxusna fxi'zesatx kvxiisxa'khanku txã'wë yü'. <sup>5</sup>Kristo's nwëese'pha'ga ma'wëga seena' nxuswa'j en pa'ja', nawa Kristo pu'çxte', txã'wëyçxáatha'w kvxiisxa'jnisa'swa jxpa'ga'. <sup>6</sup>Txã'wë i'kwe'sx ewte neeyüuwa'ja's jxpa'gaçxa kvxiisxa'jni yuukahntha'w kwe'sxa' nxuste fxi'ze'. Dxusa' kwe'sxtxi kvxiisxa'jçxa', i'kwe'sxtxiwa txã'wëy kvxiisxa'jçxa ewte nvxiituna, kxah i'kwe'sxa' wantäyya' äjane'kwe kwe'sxtxi nxuswa'j en pa'ja'k txã'wëysa i'kwe'sxtxiwa pa'thewa. <sup>7</sup>I'kwe'sxa' nxuswa'j ena'sa' jxpa'gaçxa', Dxus kvxiisxa'jni'swa txã'wëyçxáa jxpa'gawa'jsa i'kwe txã'wë yüuwa'ja's ew jiitha'w.

<sup>8</sup>Asia kiwete ma'wëtka seena' nxussa's ji'phu txã'sna miyajkwe, yakhthê'jwe'sx. Kxteea' iimejk seena' wala nxuswa'j en pa'j, açã' peena yu' itxï fxi'zewa'j ji'phmeene'tka süju'th wantäyya' çxhãçxhameeçxa. <sup>9</sup>Ãçxha' uu en yuhna süju'çxáath. Nawa naa kiwete itxï fxi'zeni's

yajkxmée Dxus itxí vxit-sana yaakxkahnçxáak txā'wē yuu. <sup>10</sup>Txakwe seena' uuwa'theçxáa yā'j fxi'zeçtewa, Dxusa' adxa's nwe'wek, sa' āçxwa nwe'wena nes txā'wē. <sup>11</sup>Kwe'sx pa'gate i'kwe'sxa' Dxus yakh puutx we'wepa'ga txā'wē nwe'wena nes yuuna sūhna Dxusçxáanath yaaki'. Sa' nasa maazkuéesawa kwe'sx pa'gate Dxus yakh puutx we'wete', Dxusa' kwe'sxtxi nwe'wena aç'a txāawe'sxa' Dxusa's weçxaatxna.

### Pablo' kīh yuuçxaga Korinton u'jmée

<sup>12</sup>Isath we'we', Dxusa's açesawe'sx yakhwa ew yuuçxáath yūuna fxi'ze, sa' i'kwe'sx yakh yu' wejxthu txā'wē ewçxáa fxi'ze sūhna yuuçxáak ūusuthe', txāa pa'gath weçxá'. Txa'wē ew yūuna fxi'zewa'ja's Dxusku pu'çx, aç'a peekx ūusuçxáa çxhāçxha yajkçxa txā'wē ew fxi'zemeeth. <sup>13</sup>Adxa' i'kwe'sxtxi karta fxi'lçxa', ísxiiya' sūhçxa fxiy yajkxna fxi'ljmeeth, aç'a i'kwe'sxa' kuh jwed yaakxnuwe. <sup>14</sup>I'kwe'sx maai' yu' adx kaapiya'jni' isasatewa jiyui'kwe na' ew jiyuna mçxā'jwe. Txā'wē ew jiyuçxa', kwe'sxtxi jxpe'jsa Jesus kīhte', i'kwe'sxa' wētwe't yaakine'kwe adx i'kwe'sxtxi ew yūupa'ga, aç'a adxwa wētwe't yaaki'nja i'kwe'sx ew fxi'zepa'ga.

<sup>15</sup>Txā'wē adx kaapiya'jni's ew jiisai'kwe txāa pa'ga adxa' e'z us pa'jya' yuwe'nja sūhna yaakxnith ji'phu' i'kwe'sx yakh weçxana puutx uyya'.

<sup>16</sup>Nyafxte' Macedonia kiwen u'jweççxa iipa'j u'jwe'nja. Sa' Macedoniajū ki' sxawedna yuhçxa ki' pa'ja'nja sūju'th. Aç'a kxtee ūsçxa Judea kiwen u'jweçte', i'kwe'sxa' adxa's pu'çxhine'kwe sūhna yaakxnith ji'phu'.

<sup>17</sup>Ew ūus yajkxmey fxi'ja'ne' kxtey yu'nja jçxawa kxtey yu'çme', Dxusa's jiimeesa na'wē, sūjuwá'kwe. <sup>18</sup>Nawa Dxusa' jiaa' adxa' e'z jwed we'we'çmeeth i'kwe'sxtxi's. <sup>19</sup>Txā'wē yūukahmení Dxus Nçxi'k Jesukristo' bagaçxte yuhwa e'z jwed we'wemée isasaçxá'sku we'we', aç'a kwe'sxa' txajx we'weni'stha'w pta'sxi' i'kwe'sx ksxavxyte Silwano, Timoteo vxite' adx yā'lçxa. <sup>20</sup>Na'wē Dxusa' kīh yūuwa'ja'swa puutx we'wek txā'sa' Kristo yuuçxáak jxuka kxtey yuu, Dxus puutx we'weni's kaavxya'jaljna. Txāa pa'gatha'w Dxusa' bagaçxtewa kxtey yuusa' jīna tuuthe'je'. <sup>21</sup>Txāasak Dxusa' adxna vxite' i'kwe'sxtxiwa pu'çx isasaçxá's kxtey yuuna fxi'zekahn, Kristo yuuçxá's selpiina fxi'zepa'ga. <sup>22</sup>Sa' Dxusa' kwe'sxtxi txhitxçxa txajx Espiritu's peesku, Dxus jīi yu'sa' kīhnawa jxuka txā'wēçxaçxáa jxpa'gawa'jsa i'kwe jīna kaajiyu'jna.

<sup>23</sup>Na'wē Korinton u'jwe'nja sūhçxawa, kxtey yuunimeeth. Nawa txāa yu' wejxwa i'kwe'sxtxi juuna' we'wena ūsya'meeth txā'wē yūu. Adx ūuste ísxiiçxa txā'jī'çmeeth txā'sa' Dxusa' jiaa'. <sup>24</sup>I'kwe'sxtxi ūusaçxaçxa txā'wē yuhmée yuumeeth, wejxwa kimwa juuna' we'wemeete i'kwe'sx pwe'sxçxáa ewkuēeçxah yuwe's pheu'khanthu ūythasna txā'wē yūu. Adx txā'wē juuna' yūukahmení i'kwe'sxa' Dxus yakh yu' çxhāçxha yā'j ūsi'kwe.

**2** <sup>1</sup>Aç'a txā'wē juuna' we'weya'çxáa yu' u'jmeete ewna sūhnath yajkx. <sup>2</sup>Adxa's i'kwe'sx yuuçxáa wētwe't kaayaki'jwa'jsa i'kwe naapkaçx

txā'wē adxa' i'kwe'sxtxi juuna' we'weçxa kxūusu'the', adxa's çkim wētweēt kaayaki'jikx? sūhnath yajkx. <sup>3</sup>Txāasath i'kwe'sxtxi kxūusu'jna pa'l'ya'mée kartaçxáa fxi'l'çxa kaah, i'kwe'sx txā'wē āhmée yūuna ūspa'ga adxa' weçxana pa'l'japkaçxte, nxuswa'l'çxáa ji'phu'nja sūhnath yajkx. Naasáa adx weçxana pa'the yuuçxáa i'kwe'sxwa txā'wēy weçxana ūswa'ja's ji'phune'kwe sūju'th. <sup>4</sup>Iiméh wala kuh yajkxna nxuçxa ū'nenath karta's fxi'l', nawa i'kwe'sxtxi juuna' yuuçxa kxūusu'jya' sūhna ūsaçxaçxa txā'wē yūumeeth. Adxa' i'kwe'sx txā'wē āhmée yūupa'ga iiméh wala peeygāhçxaçxáath txā'wē ū'nena fxi'l'.

### **Kazx pkal yūusa's peltunāyçxa kvxiisxa'khan yu'kxpehni**

<sup>5</sup>Nawa txā'wē āhmée yūusa' adxçxáana txā'wē kxūusu'jme', i'kwe'sxtxiwa jxukaysatxku txā'wē kxūusu'l', txā'wē kazx yūuçxa. (Txā'wē kazxku yūu jīnaçxáath we'we' jxuka yu' pta'sxya'mée.) <sup>6</sup>I'kwe'sx puutx we'weçxa kastigāywa'ja's vxiti'kwe txā' kxtee pa'l'çxáa ewna, jwee yu' thaakwe yuumée. <sup>7</sup>Wejxwa açxha' peltunāyçxa mekvxiisxa'l'jwe, txā'wēme' wejx thaakwe wala nxuçxa isa jxukate vxituwe'sxte. <sup>8</sup>Txāa pa'gath i'kwe'sxtxi neewe'we' peeygāawa'ja's ki' ji'phukahñ txā'wē āhmée yūusa's. <sup>9</sup>Juuna' yuukahn i'kwe'sxtxi fxi'th, nawa adx jxkaahni's aan kxtey nwēese'jetxna sūhçxaçxáath jiyuya' txā'wē yūu. <sup>10</sup>Açxha' i'kwe'sxa' txā'wē āhmée yūusa's kīh yūuni'swa mpeltunāiwe, adxwa peltunāythu peltunāywa'l' ūsu'k txā'sa' Kristo dxi'pte, i'kwe'sx pwe'sx puiimée ew fxi'zekahn. <sup>11</sup>Txā'wēme', eçxthē'ja' wala yuh jii'a' kwe'sxtxi kaypuba'l'çxa knaywa'ja's txā'sa' jiitha'w.

### **Troaste Tito's uymeeçxa, Pablo wala nxus yaakxni**

<sup>12</sup>Kristo nwe'weni's pta'sxya' Troas çxhabte pa'the', Kristo's selpiina ūswa'l' en wala yuh ewsa vxyaak. <sup>13</sup>Nawa kwe'sx yakthē'j Tito's uymeeçxa wala kuh yajkxthu, txāasath txajū kasehçxa Macedonian u'l'.

### **Kristo yakha' kīhtewa jxukak ewçxáa ya'fxi'ze'**

<sup>14</sup>Nawa Dxusa' pu'çxhi'k Kristo Jesus yakh fxi'zete', kīhtewa ewçxáa kaafxi'ze'l'jna, açal' txajx yuwe's mteewa kaajiyu'l'jwa'l'satha'w, maa maawa jiyuna jxā'khan. <sup>15</sup>Txāa pa'gatey kwe'sxa' Dxusa's jiiyā'l'ja' vxite ewte neeyūuwa'l'ja ma'tx yuu meeçxa' vxituwa'l'ja ma'tx yuu nawa kaajiyu'l'jwa'l'satha'w Dxus yakh fxi'zeni's. <sup>16</sup>Txā'wē yā'the', çkim txā'wē Dxus yuwe's kaajiyu'l'ja' u'l'jwa'l'ja ūstxki? Vxituwa'l'ja yakh yu', Dxus yakh fxi'zeni' wala yuh ewmée theguna, naapkaçxha' ewte neeyūuwa'l'ja yakha' iiméh seena' zhiçxkwesa yuuna. <sup>17</sup>Maafiá' Dxus yuwe's yu'pthehçxa fxiytxi pta'sxna pekūju'. Nawa kwe'sxa' txā'wē yūçmeetha'w, sa' Dxus yuwe's vxyuu pa'gawa pta'sxna ūsmeetha'w. Txā'wē yūuya'méefi, kwe'sxa' Dxus kaahnisatha'w, Kristo's selpisáa. Txāasatha'w īsxiimée ūsuh jxuka isasaçxá's we'we' Dxus dxi'pte.

## Nwe'wewa'ja's u'se pheu'jçxa Dxus nvxiitnisa

**3** <sup>1</sup>Txãwê we'wena fxi'ljçxa', peekíçxáa ewspath jīnak we'we' çsūjuwá'kwe? Meeçxa' vxitewa na'wêtx neewe'wenisa karta jxūçxa pa'ja' aça' txāawa txãwêy jxūçxa pa'jwa'l' j'i'pha' çsūjuwá'kwe? Meeçxawa i'kwe'sx neewe'wenisa karta kutxi'l'jwa'l' j'i'pha' çsūjuwá'kwe? <sup>2</sup>Adxa' txãwê vxitesa neewe'wenisa karta jxūçxa pa'jwa'l' j'i'phmeeth, txāa pa'gatey adxna neewe'wewa'jsa' i'kwe'sxíçxáa i'kwe. Txāasa adx mjīini's maatxwa kaajiyu'l'jwa'jsa' i'kwe'sxi'kwe, karta na'wêsa. <sup>3</sup>Kwe'sxtxi neewe'wesa' Kristo', txāasak txajx kuseju yuu fxi'ljçxa karta ūs, aça' txāa karta' i'kwe'sxi'kwe. Nawa txāa karta' tintaju fxi'ljni yuume'. Dxus Espiritujuk fxi'ljni yuu, sa' kwet taplatewa fxi'ljni yuumée, nasaa ūstek fxi'ljni neeyūu.

<sup>4</sup>Kristo pu'çxpa'ga, Dxusa's selpiiya' ājāth, txāasath īsxiimée isa we'we'. <sup>5</sup>Dxusa's selpiiya' ājānisa' peekxçxáa txãwê ya'ājā'çme'. Txā'sa' Dxus pu'çxtek txãwê ya'ājā'. <sup>6</sup>Dxusa' naa ensu nasatx nwe'weya' ājāwa'ja's pheu'jçxa nvxihtku txã' leya's nwēese'l'jwa'l' yu'çme', naasáa Dxus Espiritu's yuuçxáa ūste jxpa'gawa'kh yu', aça' txā'sna pta'sxya' ājāwa'ja'sku Dxusa' adxa's pu'çx. Ley fxi'ljçxa nvxiitnisa' uuwa'theçxáak vxit, naapkaçxha' Dxus Espiritu' Dxus yakh fxi'zewa'ja'sku vxit.

<sup>7-8</sup>Moises ley kwet taplate fxi'ljnisa's jxpa'ga enteçxáa yuhwa seena' yuh zhiçxkwe eena' kweethku. Txāa pa'ga Moises dxi'pwa txãwêyku eena' kweethna neeyūu. Aça' Israelwe'sxa' Moises dxi'pte thegya' ājāmeeta', Moises dxi'pa' seena' eena' kweethpa'ga. Nawa tuhdthdçxah ūçxhana u'kh. Txãwê uuwa'theçxáa vxit-sa leya's jxpa'ga enteçxáa yuhwa txãwê seena' zhiçxkwe eena' kweethçxa', Dxus Espiritu kaapiya'l'jni en yu' wejx thaakwe zhiçxkwesa'. <sup>9</sup>Txãwê yuuwesa i'kwe jīna pta'sxsa leya's jxpa'ga enteçxáa yuhwa seena' zhiçxkwe yuuk aça' kwe'sxtxi yuuwemée ewte nvxiitwa'jsa's pta'sxni en yu' wejxku thaakwe zhiçxkwesa yu'. <sup>10</sup>Ley jxpa'ga ente' txãwê yuh seena' zhiçxkwesa yuuk. Nawa āçxh naa ensu thaakwe zhiçxkwesa vxyaak txāa yakh kaaja'da'the yu', nyafxiiwe'sxa' seelpimeesak yuu. <sup>11</sup>Txaçxmeeçxáa selpiwa'jsa pa'l' enteçxáa yuhwa zhiçxkwe yuuçxa', bagaçxte yuhwa pçumée selpiwa'l' en yu' wejx thaakwe zhiçxkwesa'.

<sup>12</sup>Txãwê bagaçxte yuhwa pçumée selpiwa'ja's jiiçxath āate pta'sxna we'we'. <sup>13</sup>Adxa' Moises na'wê yūuçmeeth. Moisesa' txaçxmeeçxáa eena' kweethnisa ūçxhaçte Israelwe'sx uywe'sxte dxi'pa's yaaphku. <sup>14</sup>Sa' Moisesa' kīh yuukahn txãwê yaaphtewa Israelwe'sxa' jiyumeeta'. Sa' āçxh pa'l'jwa aphni ūsna jiyukahmen, txāa pa'gatx txāa leya's lēeyçxawa jiyu'çmée. Aça' txāa aphnisa's Kristo's pi'kçxça yuuçxáa phaadeya' ya'ājana. <sup>15</sup>Āçxpkaçx aphni ūsna, Moises fxi'ljnitx lēeyçxawa jiyukahmen. <sup>16</sup>Aça' maawa Jesukristo tasxte utxaate yuuçxáak txāa aphnisa' phaadeni

yu' jiyukahñ. <sup>17</sup>Kwe'sxtxi jxpe'jsa' Dxus Espiritu', aça' txāa yakh ũste yu', jiyuwa'ja's weh yuhwa ya'jypubameena. <sup>18</sup>Txāa pa'gatey kwe'sxa' dxi'pa's yaaphni ji'phmeetha'w, txāa pa'gak Dxus kweethni' kwe'sx dxi'pte speeju na'wē eena' kweethya' ājā'. Aça' Dxus Espiritu pu'çxte', jxukaysa jwee fiçxáatha'w Kristo ma'wēsate', txāa na'wēy fxi'zena u'jya' āja', kwe'sxtxi jxpe'jsa Dxus Espiritu' txā'wē yūuwa'ja'sku pu'çxhi' naa pa'ga.

**4** <sup>1</sup>Āhmeekwetewa Dxusku neewe'weçxa nvxiht txajx tasste selpiwa'ja's, kxahtha'w çxhāçxha yajkxna fxi'ze'. <sup>2</sup>Kwe'sxa' jxuka nvxihttha'w paaçte ewmée yūuna iŕxiina fxi'zeni's. Txāasa ewmée yajkçxça Dxus yuwe's yu'pthehna ũsmeetha'w. Isasaçxáanatha'w we'we', aça' Dxus dxi'pte iŕxiija'çmeene' sūhnaçxáa miijajkxwe jxukaysa. <sup>3</sup>Nawa ewte nvxiitwa'jsa Dxus yuwe's pta'sxi'tha'w txā'sa' maafi yu' açamée wāa ew jiyutxna, nawa txāa yu' vxituwa'jsa yakhçxáa txā'wē yūuna. <sup>4</sup>Txā'wē yūukahñí naa kiwete jxkaahna ũssa eçxthē'ja' txāawe'sx ũus yaakxni's jxuka aphku, Jesukristo Dxus na'wēysa kaapiya'jni zhiçxkwesa's jiyukahmen. <sup>5</sup>Sa' kwe'sxtxi nwēese'j jxthāaçxça pta'sxi'çmeetha'w, wejxwa kwe'sxtxi nwe'wesa Jesukristo yuuçxá's nwēese'jwa'ja' jīnaçxáatha'w pta'sxi', kwe'sxa' naasáa i'kwe'sxtxi selpiisaçxáatha'w, Jesusa's nwēese'jsa. <sup>6</sup>Dxusa' nyafxiitey kīh yuhwa meetey çxhi'dx walate eena'sa's kaakh kweethkahn txāa Dxusfiçxáak kwe'sx ũustewa eena' kaakweethe'j, Jesukristo' Dxusfiçxáatewa jiyukahñ.

### Dxusa' pu'çxhina sūhnaçxáa fxi'zeni

<sup>7</sup>Dxusa' kwe'sxtxi's neewe'wek Kristo kaapiya'jni txakwe seena' zhiçxkwesa's. Nawa kwe'sxa' txā'wē seena' zhiçxkwesa's we'weya' yu' ājawa'jmeesatha'w, aça' txā'wē kwe'sx yu' ājameete fiçxáak Dxusçxaxçáa pu'çxhi'. <sup>8</sup>Txāasafiçxáak thēyte fxi'zewa'j iiméh wala pa'thewa, txajūwa kasejxa' ājawa'ja's pu'çxhi'. Aça' nxuswa'j en pa'thewa, Dxusa' pu'çxhina sūhwa'j yuuçxá'stha'w ji'phu'. <sup>9</sup>Naa kiwetewe'sx yu' ahçetewa, Dxus yu' açeni fxi'ze'çmeetha'w. Pkxuuni fxi'zeçxawa, jxukate yu' vxituni yu'çmeetha'w. <sup>10</sup>Jesuswa ma'wēga uu txāa na'wēy uusáa na'wē yuuwa'j ji'ptha'w, iŕxi yuusáa Kristo pu'çxni's jxpa'gaçxça txāa na'wē yuuçxáa fxi'zeya'. <sup>11</sup>Nawa kwe'sxa' naa kiwete nee fxi'ze'ççça', bagaçxtewa ikh wēeniçxáatha'w fxi'ze', Jesus kaapiya'jni's pta'sxpa'ga. Txāa pa'gak iŕxi yuusáa Kristo pu'çxni' vxyaana nes yu'. <sup>12</sup>Txāasatha'w kwe'sxa' ikh wēeniçxá's jxpa'gana fxi'ze', naapkaçxha' i'kwe'sxa' Dxus yakh fxi'zewa'ja's i'kwe jxpa'gana fxi'ze'.

<sup>13</sup>Dxus librote' na'jīnak we'we': Dxus pu'çxwa'ja's jiith yu', txāasath txā'wē we'we' jī'k. Aça' kwe'sxwa txā'wēy Dxus pu'çxwa'ja's ew jiitha'w, txāasatha'w pta'sxi'. <sup>14</sup>Sa' Dxusa' kwe'sxtxi na'wē yūuwa'ja'swa jiitha'w: Jesus uutewa ki' iŕxi vxitku, sa' kwe'sxtxiwa txā'wēy ki' iŕxi vxituna. Txā'wē yūuçça txajx ũsnite pe'jna u'jwena petx i'kwe'sx yā'jçça Jesus

yakh fxi'zepa'ga. <sup>15</sup>Kwe'sxa' pkuuuni nxustetha'w fxi'ze!, nawa i'kwe'sx ewte fxi'zewa'ja's uykahntha'w txā'wē yu!, kxah maazkuēesawa Dxus peeygāani's jxpa'gaçxa', kxaazkuēesay Dxusa's weçxana tuuthe'jetxna.

<sup>16</sup>Txāasatha'w kwe'sxa' bagaçxtewa üukhmée Dxusçxá's çxhāçxha yaaki!. Makwe kwe'sx kakwete çxhāçxhasa yu' pçuuna u'jweçtewa, Dxus yakh weçxana fxi'zewa'j yu' jweeíçxáak een isa çxhāçxha ya'fxi'ze!.

<sup>17</sup>Txāa pa'gatey naa kiwete nxuste fxi'zenisa' dudtewe'sxçxáa, txaçxmey skhēwwa'jsa!. Aça' txāa skhēwniijū' bagaçxte yuhwa skhēwwa'jsamée iiméh ewsa'sku cielute ya'ji'phu!. <sup>18</sup>Naa kiwetewe'sxa's yaakxwa'j ji'phmeetha'w, cielutewe'sxçxá's yaakxwa'j ji'ptha'w. Txāa pa'gatey naa kiwetewe'sxa' txaçxmey skhēwwa'jsata!, nawa cielutewe'sxa' bagaçxte yuhwa skhēwwa'jsa meeta!.

**5** <sup>1</sup>Txajíçxáa kwe'sxa' ew jiitha'w naa kiwete itxí fxi'zenisa kakwe pçuutewa, vxite kakwe bagaçxte yuhwa pçuwa'jsamée thaakwe ewsa kwe'sx jii pheu'jni ji'pha' Dxusa' cielute. Txā' pçuwa'jsa naa kiwetewe'sx na'wésame!. <sup>2</sup>Txahtha'w naa kakwete nxusna nee itxí fxi'zeççxa!, dud cielute üswa'j kakwe's jxpa'gawaça' sühna yaaki!. <sup>3</sup>Txājū yuuçxa!, kakwe ji'phmée yu' üsmée, kakwe ji'ph neeyü'nja'w. <sup>4</sup>Naa kakwete nee itxí fxi'zeççxa!, nxus yajkxnatha'w fxi'ze!. Nawa naa kakwe üsxsas ahçeçxa dud uuwaça' sühçxa txā'wē nxus yaaki'çmeetha'w, naasáa naa kakwe's dud phu'sel'jni yuute!, kwe'sx kakwe pçuwa'jsaçxawa kxtee u'se yuuna pa'jana sühçxatha'w txā'wē yūuwa'ja's dud jxthāasu!. <sup>5</sup>Txā'wē yūuwa'ja's Dxusku pheu'j, txāasak txā'wē yūuwa'ja's jxpa'gawa'jsa yuji'kwe jīçxa nyafxte txajx Espiritu's khuē'y üs.

<sup>6</sup>Pejka txā'wē yūuwa'jsa yuhtha'w, nawa naa kakwe yakh nee itxí üsfi' yu!, cielute kwe'sxtxi jxpe'jsa Jesukristo üsna kxtee açxhí yu' üsya' ājā'çmeetha'w. <sup>7</sup>Nawa pejka kxtee pa'jwa'jsa yuhtha'w sühnaçxáatha'w fxi'ze!. <sup>8</sup>Txā'wē kwe'sxtxi jxpe'jsa tasxte pa'jwa'ja's jiitha'w, txāasatha'w naa kakwete itxí fxi'zeni's nvxihtçxa txāa yakh üsya' u'j wēje!. <sup>9</sup>Txāasa naa kakwe yakh nee üsüi mtha'w yuu, khīmeeçxa' naa kakwe's ji'phmée yā'jmtha'w yuu, nawa Kristo dxi'pte ew fxi'zewa'ja's yuuçxáatha'w pa'pçxu!. <sup>10</sup>Txā'wē jxpa'yakxmeete!, Kristo tasxte jxukaysa kuutxa'lnisa yu'nja'w. Naa kiwete ew mtha'w selpiisáa yuu, meeçxa' ewmée mtha'w selpiisáa yuu nawa teeçxsa na'wēçxah peekx selpiini's jxpa'gawa'jsatha'w.

### **Dxus yakh yuuwemée neeyüuni's pta'sxni**

<sup>11</sup>Txā'wē Kristo tasxte utxaaçxa ma'wē selpiisaçxawa txā'sa' paswa'j ji'ptha'w, txāasath Dxusna yuuçxáa selpi' i'kwe'sx dxi'pte. Adx ma'wē selpini'swa Dxusa' jiiyā'ja!, aça' i'kwe'sxwa adx kīh yūusatewa jiyuwaça' ewna sūju'th. <sup>12</sup>Adxa' thaakwe ew selpisaath jina iiwejçx we'wena üsmeeth, naasáa adx ew selpini's i'kwe'sx yaakxkahnçxáath txā'jī!. Txā'wē adx ew selpini's i'kwe'sxa' jii üsçxa íçxáa, adxna ewmée

nuywe'wesawe'sxtxi' pasya' ãjãne'kwe. <sup>13</sup>Adxa' luuku na'wẽ wá'ntka we'we', nawa txã' Dxus jĩ'. Aça' luuku na'wẽmée we'weçxa yu', i'kwe'sxtxi ne'tka we'we' jiyukah. <sup>14</sup>Kristo' jxukaysa pa'gate peeygãhçxa uuk, aça' txãa peeygãani's yajkxte', txã'sna selpiwal' yuuçxáak kaseje', na'wẽ yajkxna: <sup>15</sup>Kristo' jxukaysa pa'gate uupa'ga, maawa txãa yakh ússa' jxukaysa usáa na'wẽsatha'w yuu sũhna. Aça' txãa yakh fxi'zesawe'sxa' ma'wẽwa fxi'zemée, wejxwa na'wẽ txãawe'sx pa'gate uuçxa ki' itxĩ yuuk txã'sçxáana selpiina fxi'zewa'jsata'.

<sup>16</sup>Txãa pa'ga açxhũyã'ja' vxite ma'wẽsatewa txãatx thegna ústeçxáa yuhwa yaakxwal' ji'phmeetha'w. Adxa' nyafxíi yu' wala ne'tka jxpuba, txãasafíth Kristo's naa kiwete kwe'sx na'wẽysafíçxá' sũhna yaakxni ji'phu'. Nawa açxha' txã'wẽ yaakxni's yu'pthehwa'ja', <sup>17</sup>txãa pa'gatey maawa Kristo tasxte utxasá' jxuka yu'pthehnik yu'. Nyafxíi yajkxna fxi'zeni's nvxihtçxa, u'sesaçxaçxáak ya'jypa'ga'.

<sup>18</sup>Txã'wẽ u'se yuuwa'ja's Dxusçxaçxáak vxitu', txãasak txãa yakh ew fxi'zewa'ja'swa vxitu', kwe'sx pa'gate Kristo's uuwa'j vxitçxa. Dxusa' txã'wẽ yúuçxak adxa's neewe'weçxa nvxiht, txãa yakh ew fxi'zewa'ja's jxukaysatx pta'sxkahn. <sup>19</sup>Ew jiyute yu', Dxusa' naa kiwete nasaa pkaltxi jxuka peltunãyçxa txãa yakh ew fxi'zewa'ja's pheu'jya'k txã'wẽ Kristo's uuwa'j vxitna úsu'. Dxus txã'wẽ yũuni's pta'sxkahnku adxa's neewe'weçxa nvxiht. <sup>20</sup>Txãa pa'ga adxa' Kristo nwe'weni's pta'sxya' Dxus kaahni yuhth. Txãasath Dxus yuu we'we'ç na'wẽ adxa' i'kwe'sxtxi jxkaaja' na'jĩna: Dxus tasxte mutxaawe, txãa yakh fxi'zeyá'. <sup>21</sup>Kristo' kíh pka' yuhwa ji'phu'çme', nawa kwe'sx ewmeesapa'gaçxáa txãak Dxus kastigo's jxpa'ga. Aça' kwe'sxa' Kristo's jxpa'gaçxa', ewmeesaçxawa Dxus dxi'pte yuuwemeesa yuukahnu txã'wẽ yũu.

**6** <sup>1</sup>Txãasa adxa' Dxusna selpisaath. Txãa pa'gath i'kwe'sxtxi yu'kxpeje': Dxus peeygãani's jiyuyã'jçxa', wa'lmée jxpa'gakahn.

<sup>2</sup>Dxus peeygãawa'j ena's na'wẽk pta'sxi' Dxus libruete:

Ju'gu yuuwa'j en áhte', wẽse'th,

Sa' pu'çxthu ewte neeyũukahn jĩ'k.

Txãa pa'ga açxha' txã'wẽ yũuwa'j en ájk, aça' naa ensu' ewte neeyũuwa'j ente ústha'w.

<sup>3</sup>Adx mjĩini's ewmée nuywe'wekahmen, kim yuhtxwa ewmée yũuna úsmeeth. <sup>4</sup>Makwe wala pxthaa yuuna, wantãyna, kíhtewa pejiina, thẽyte fxi'zena úsçxawa, Dxusna selpiinisaçxá'sthi kaavxya'ja'jna fxi'ze'. <sup>5</sup>Adxa's pãpaçxa karcelte txaahnisath yuu. Wẽesxuna pkxuuni wala thẽyte fxi'ze'th. Çxhãçxha mjĩweete deewa'j en yuhwa uymée, wẽnath fxi'ze'. <sup>6</sup>Nawa Dxus dxi'pte na'wẽ ew yũuniçxá'sthi kaavxya'ja'jna fxi'ze': açewe'weçtewa ka'tu yu' ew yũuna, Dxus Espiritu adx yakh fxi'zeni's kaajiyu'jna, úusuh jxuka peeygãani's kaavxya'ja'jna, <sup>7</sup>isasaçxá's pta'sxna, Dxus pu'çxni's kaavxya'ja'jna. Sa' açewe'wesatx paswa'j



ma'k yuu meeçxa' pkuuçuete paswa'j ma'k yuu nawa kîhtewa ewçxáa paswa'ja'sçxáath yajkxna fxi'ze!. <sup>8</sup>Sa' ki'kinte! wedxnith fxi'ze!, nawa maa enteya' açenith fxi'ze!. Vxite ensuy yu' ew we'wena ki' ewmée we'wenith fxi'ze!. Ki'kinteya' îsxiisa' jîna nuywe'weni, nawa maa enteya' isasa's pta'sxa' jîna we'wenith fxi'ze!. <sup>9</sup>Maa enteya' nasa jiyunimeesa thastxi adxa's we'we!, nawa maa entey yu', adxa's wala namiku na'wêtx ew we'we!. Maa enteya' uuwa'theçxáa yâ'th fxi'ze!, nawa u'ç yu' meeth. Wala pkuuuni yuuçxawa, ikhni yu' yu'çmeeth. <sup>10</sup>Makwe wala kxüusu'jni ûsçxawa, weçxanath fxi'ze!. Naa kiwete kîhwa ji'phmeesaçxawa, maazkuéesatxwa ji'phsath vxitu' Dxus dxi'pte. Makwe ji'phmeesaçxawa, kîh yuhwa peeji yu' meeth fxi'ze!.

<sup>11</sup>Korintote yakhthê'jwe'stxi îsxiiçxa txâ'jî'çmeeth, adx üuste üusutheni's jxuka äateth we'we!. <sup>12</sup>I'kwe'sx yu' adxa's açeyaaki'ne'kwe, nawa adxa' ka'tu yu' i'kwe'stxi' açeyaaki'çmeeth. <sup>13</sup>Neya' luuçxtxi's ma'wêga peeygâhna we'we!, adxwa i'kwe'stxi' txâ'wêythu peeygâhna we'we!. I'kwe'sx üus yaakxni's paaçteçxáa ji'phumée äate we'wekahnthu adx üus yaakxni's äate we'we!.

#### Dxus îtxisa üswa'jçxáatha'w

<sup>14</sup>Dxusa's jiimeesawe'sx yakha' ptamuwa'jme!. Txâ'wême! kxteeçxah txâawe'sx na'wêy yûuna fxi'zeya' äjameene'kwe. Ewsa' ewmeesa yakh fxi'zewa'jsame!. Eena'sa' çxhi'dxa yakh kxteeçxah üsya' ewu'çmeeta!. <sup>15</sup>Kristo' eçxthê'j yakha' puutx utxa'çmeeta!. Dxusa's jiisa' Dxusa's jiimeesa fxi'zenite fxi'zewa'jme!. <sup>16</sup>Dxus üsnite! Dxus îtximeesa' üswa'j ji'phmeeta!. I'kwe'sxa' Dxus îtxisa üswa'jçxáa i'kwe. Txajîk Dxusa' na'jîna we'we:

Adxa' txâawe'sx Dxus yu'nja,

Txâawe'sx üuste fxi'zewa'jsa.

Aça' txâawe'sxa' adx luuçx yuutxna jî'k.

<sup>17</sup>Sa' vxite ajkhêwa na'jînak we'we:

Ewmeesawe'sx ksxavxyu kasehçxa utxaanuwe,

Sa' ewmeesa's jxa'dxnuwe.

<sup>18</sup>Txâ'wê yûute!, i'kwe'stxi adx jxpa'gaçxa

Ney na'wê yu'nja.

Aça' i'kwe'sxa' adx luuçx yuune'kwe jî'k kîhtewa jxuka äjâsa Dxusa'.

**7** <sup>1</sup>Dxusa' txâ'wê ew fxi'zewa'ja'sku jxkaaja!. Txâa pa'ga, yakhthê'jwe'sx, wala jxpa'yakx fxi'zewa'j ji'ptha'w, kwe'sx kakwe ma'k yuu meeçxa' kwe'sx üus ma'k yuu nawa suwwa'jsa yu'sa' ka'ga'jwa'j ji'phmeetha'w. Dxusçxáana yajkxna jxpa'yakx fxi'zewa'j ji'ptha'w.

#### Korintotewe'sx ewmée yüunijü sxawedni

<sup>2</sup>Adxa's açeyaakxnuwe. Adxa' kim yuhtxwa îsxiina kaypuba'jna ewmée yûuna üsmeeth. <sup>3</sup>Aça' i'kwe'sxçxáa yuuwesa i'kwe jçxa txâ'jî'çmeeth.



Txã'wê yajkxmeeçxaíith adx peeygãanisa i'kwe, txãasa adx yakh ja'daçxah fxi'zena txutemey uuwa'jsatha'w jînath we'we. <sup>4</sup>Makwe seena' nxuswa'j ente üsçxawa, i'kwe'stxxi yajkxçxa weçxanaçxáath fxi'ze', weh yuhwa ewmêe yu' yajkxmêe.

<sup>5</sup>Macedonia kiwete pa'jîi le'çxkuêçxáa yuhwa jxkaasewa'j jì'phumeeth. Kîhwa jxukak thêysaçxaxçáa vxayaa, adx pekühnisu yu' mteewa jxuka. Açesawe'sx yakh pdxi'puwa'jwa jì'phuth, sa' ûustewa ûukh yaakxwa'j kasejk. <sup>6</sup>Nawa Tito pa'pha'ga Dxusa' adxa's kvxiisxa'kh, nxusna ûstewa. <sup>7</sup>Nawa Tito yakh puutx uypa'gaçxáa adxa's txã'wê weçxa en pa'jme'. Tito' adx tasxte seena' wala weçxana pa'kh, i'kwe'sx ew yûuya' yaakxpa'ga. Sa' pta'sxku txakwe wala âhmêe yûuçxawa idx yakh weçxaya' puutx uy wêje'tx jînisak wejx wala kvxiisxa'j.

<sup>8</sup>¿Kîjxa'ki'th i'kwe'stxxi juuna' we'wena txã'wê karta fxi'j? sühna wala kuh yajkxthu txãa ensu yu'. Nawa açxha' txã'wê yaaki'çmeeth. Nyafxíu yu' txã'wê yaakxahníi txãa karta' i'kwe'stxxi wala kxûusu'kh maz en yu'. Txagaçxhíçxáa juuna' we'weni's kuh yajkxçxa', açxha' adxa' weçxa'th. <sup>9</sup>Nawa i'kwe'stxxi kxûusu'jçxa weeçx yajkxna txã'wê weçxaçmeeth, wejxwa txãa juuna' we'wenisa' i'kwe'stxxi wala selpiik, ewmêe yûuniijû kaasxwedujna, txãa pa'gaçxáath weçxá'. Aça' i'kwe'sxa' txãa nxus en pa'pha'ga úusçxa yajkxmêe Dxus dxi'pte ew fxi'zewa'jçxá's i'kwe kxtey yuu. Txãa pa'gath adxa' kimnawa açesameeth súju'. <sup>10</sup>Txãa pa'gatey âhmêe ne'tka'w yuu sühna wa'lmêe Dxus yakh ew fxi'zewa'ja's pakwete', ewmêe yûuni's nvxihtçxa ewte neeyûuwa'ja'sku ya'jypa'ga'. Txãa pa'ga nxuswa'j entxi' açewa'jme'. Nawa âhmêe ne'tka'w yuu sühwa'ja's yajkxmeete', vxituwa'jçxáak kaseje'. <sup>11</sup>I'kwe'sxa' Dxusçxáana yajkxna ne'kwe txãa nxusnisa's ahçemêe jxpa'ga. Aça' txã'wê yûupa'ga ma'wêga ew fxi'zewa'j kaseh txã'sa' miijajkxwe naata': Áhmêe ne'tka'w yuu sühna ûukhçxa yuwe's pheu'jya' yajkx i'kwe, txãa ewmêe yûusa's kastigâywa'ja's puutx we'wena. Txã'wê yûuçxa', adx yakh puutx uyya' yajkx i'kwe. Txãasa i'kwe yuuwemeesa yuu. <sup>12</sup>Adxa' txãa karta's fxi'jçxa', txãa ewmêe yûusa's açeyajkxna txã'wê yûumeeth, sa' ewmêe yûute nxussa'swa yajkxna txã'wê fxi'jmeeth, naasáa i'kwe'stxxi' wala yuh yaaki'th Dxus dxi'pte txã'sa' i'kwe'sx jiyukahñçxáath txã'wê fxi'j. <sup>13</sup>Txãasath i'kwe'sx kxtey yuute' wala weçxawa'ja's jxpa'ga.

Nawa na'wê weçxawa'ja's jì'phuth txãajû jweeíçxáath wala weçxawa'j jì'phu i'kwe'sxa' Tito's wala ewçxáa jxpa'gaçxa ewçxáa ne'kwe jxpe'ljna úsu' aça' weçxanak sxawed naa pa'ga. <sup>14</sup>Adxa' Tito's kajaççxa' i'kwe'stxxi we'wena: Wala ewsata' jîth txã' ísxiini kasehme'. I'kwe'sxa' adx yaakxni's kxtey i'kwe yuu, Tito's ew jxpa'gana. Txãasa adx we'weni' bagaçxtewa isasaçxaxçáata'. <sup>15</sup>I'kwe'sxa' ma'wêne'kwe ewkuêçxáa jxpa'gaçxa txajx we'weni's kxtey nwêese'j txã'wê ew yûuni's yajkxçxak Tito' jweeíçxáa i'kwe'stxxi's wala weçxá'. <sup>16</sup>I'kwe'stxxi's kîhte yuhwa ewmêe yaakxwa'j jì'phmeeth, txãasath weçxá'.

**Ji'phuni's wa'lmée weçxana peesni**

**8** <sup>1</sup>Āçxha' yakhthê'jwe'sxtxi pta'sxi'th Dxus luuçx Macedonia kiwesuwe'sxa' pu'çxwa'ja's ãate kaavxya'ja'jtx Dxus kaayaki'the. <sup>2</sup>Txãawe'sxtxi' txakwe wala thêyte fxi'zewa'j pa'jçxawa, Dxus yakh jweeíçxáa çxhãçxha fxi'zekahnku txã'wê yūu, txãa pa'ga wala weçxana fxi'ze'tx. Txãasatx wala ji'phmeesaçxawa ũçxhi'dxmée pees. <sup>3</sup>Txãawe'sx ji'phuni yu'sa' wa'lméetx pees, sa' ma'wêçxáawa yūuna pakweçxatx txã'wê yūu. Txã'wê yūuni's adxa' ew jiith. <sup>4</sup>Txãawe'sx we'weçxa': Kwe'sxa' yakhthê'jwe'sxtxi pu'çxya' vxyuu pkhakh wêje'tha'w aça' idxa' ¿ma'jiki'g? jīnatx we'we. <sup>5</sup>Aça' adxa' kxtee pa'j yu' yuumeetxna sūju'ne'thka. Nawa nyafxte' txãawe'sx kakwe yuunatx Dxus kusete dukh Dxus jxthãasniçxá's kxtey yuuya'. Txã'wê yūuçxatx kwe'sx ma'wê jxkaathewa kxtey yuuya' yajkx. Txã'wê yūuni'sthū pta'sxi'. <sup>6</sup>Aça' Tito nyafxī i'kwe'sx yakh ũçxa', vxyuu pkhakhya' takhku txã'sa' pkhakhna kãaja'khan Tito's neewe'weçthū ki' yuja' naa pa'ga. <sup>7</sup>I'kwe'sxa' kīhtewa jxuka ājāsa i'kwe Dxusçxáana yajkxna, wa'lmée kaapiya'jna, wala jiisa i'kwe, dud pa'pçxuwa'ja'swa nwēese'jna adxnawa ahçemée peeygāasa i'kwe. Txāasa pu'çxwa'j vxyuu pkhakhwa'ja'swa txã'wēy myūuwe.

<sup>8</sup>Juuna' jxkaahna txã'jī'çmeeth, naasáa vxitesa pa'pçxuni's jiyuçxa', i'kwe'sxwa isa peeygāja'ççxa', txã'wēy pu'çxhiwá'kwe sūhçxaçxáath txã'jī'. <sup>9</sup>I'kwe'sxa' peekx jii i'kwe kwe'sxtxi jxpe'jsa Jesukristo peeygāani's. Txã' ji'phsak yu', nawa kwe'sxtxi wala peeygāhçxa ji'phmeesak yuu, txajx ji'phuni's kwe'sxtxi ũsya'.

<sup>10</sup>I'kwe'sxa' jū'na anxutey pu'çxya' takhi'kwe, nawa jxkaatheçxáa txã'wē yūumée, peekx yuu i'kwe txã'wē pu'çxya' yajkx, aça' txã'wē yūunisa' ewsa yuja' jīnath yu'kxpeje' adxa'. <sup>11</sup>Nyafxīwa ma'wēkwe weçxana peesna ũsu' i'kwe'sx ji'phuni yu'sa', āçxwa txã'wēyçxáa myūuwe kãaja'phkaçx. <sup>12</sup>Txãa pa'gatey ma'wēkuēçxáa ji'phçxawa, wa'lmée weçxana peesni's Dxusa' jxpa'ga'k. Dxusa' jīia', ji'phmeetewa.

<sup>13</sup>Txã'wē i'kwe'sxa' vxitesatx pu'çxte', txãawe'sxçxáa peejimée fxi'zete', i'kwe'sx yu' ji'phmée thêyte fxi'zekahn txã'jī'çmeeth. <sup>14</sup>Puutx ya'pu'çxna ja'daçxah peejimée fxi'zekahnthū txã'jī'. Āçxh naa ensuy yu' i'kwe'sxa' kīhwa ji'phi'kwe vxite peejiina fxi'zesatx pu'çxwa'j. Nawa vxite ensu' i'kwe'sx ji'phmée peejiina fxi'zeçpkaçxha', txãawe'sx i'kwe'sx peejini's pu'çxhitxna. Txã'wē yūuna puutx peejimée ya'fxi'zena. <sup>15</sup>Txã'wē puutx pu'çxwa'ja's pta'sxçxak Dxus libruite na'jī': Wala pkhakh'tewa kijaame', sa' le'çxkuēe pkhakh'sanawa peejime' jī'k.

**Tito yakh vxite kaapi'ki'jçxa kaahni**

<sup>16</sup>Dxusa' Tito's kaayaki'jne' adx na'wēy i'kwe'sxtxi's peeygāawa'ja's. <sup>17</sup>Txãa pa'ga āçxha' i'kwe'sxtxi's thegya' yuja' kimwa jxkaahmeete, txajx ũuste peeygāawa'ja's yajkxçxa, sa' adx neewe'weni's kxtey yuuya' yuja'.

18 Tito's pi'kxna teeçx yakthê'j kajaçthu. Txâ'sa' Dxus luuçx msuuwe'sxwa wala neewe'we'tx Dxus yuwe's wala pta'sx pu'çxsa' jîna. 19 Sa' txâ'wêçxáa neewe'wemée, txâa yakthê'ja's txhitxhti. Na'wê Dxus dxi'pte kselpi'ji'jwa'j vxyuu pkhakhna ũstha'w txâ'sna adx dukhya' Jerusalenna u'jweçte pi'kxna u'jwa'jsa jîçxatx txhitxh. 20 Adxa's ewmée nuywe'wewe'sxte, txâa yakthê'ja' adx yakh ja'da yuua'jsa', na'wê peeswa'j pkhakhna ũsta' txâ'sna jxūna u'jweçte. 21 Kîhtewa jxuka ewçxáa yūuya' ũsthu, Dxus dxi'pteçxáamée, nasaa dxi'ptewa txâ'wêy.

22 Titowe'sx txâa e'zsaçxáamée, vxite yakthê'ja'swa kajaçthu, txâ' ew yūuwa'j yu'sa' kîhtewa jxukak pa'pçxuna fxi'ze', sa' âçxha' i'kwe'sx yuutxi'sa' wejxku wala thaakwe weçxana yaaki'. 23 Tito kxtee pa'the', i'kwe'sxtxi pëyiwáatxna çTito' kimna? jîna, aça' Pablo yakh mjii pu'çxsa' ayte kwe'sxtxi selpisáa jîne'kwe. Meeçxawa vxite yakthê'jwe'sxtxi wáa çkimtxna? jîna pëyitxna aça' Dxus luuçx neewe'weçxa kaahnisata', Kristo's selpisáa jîne'kwe. 24 Âçxha' i'kwe'sx peeygāani's áate mkaavxya'ja'jwe txâa yakthê'jwe'sxtxi ew jxpa'gana, kxah Dxus luuçx vxite ahsu pkhaakhesawe'sxwa i'kwe'sx peeygāani's jiyutxna, aça' i'kwe'sxtxi adx we'weçxa': Ewsata' jî'th txāawa kxtey kasejena.

### Yakthê'jwe'sxtxi pu'çxwa'j vxyu pkhakhni

9 1 Dxus yakh fxi'zesa yakthê'jwe'sxtxi pu'çxya' vxyuu pkhakhwa'ja's i'kwe'sxtxi kaayaki'jna fxi'jwa'j peejmeena súju'th, 2 txāa pa'gatey i'kwe'sxa' kîhtewa wa'lsameetewa jiith. Txāasath Macedonia kiwesuwe'sxtxi'sa' weçxana na'jîna pta'sx: Akayasuwe'sxa' jū'na anxutey pu'çxya' ih ũsta' jîth. Aça' Macedonia kiwesuwe'sx maazkuéesawa i'kwe'sx pu'çxya' yaakxni's jiyuçxa', txāawe'sxwa pu'çxya' yajkxtxi. 3 Txā'wêtewa naa yakthê'jwe'sxtxi' neewe'weçthu, kxah adx we'weçxa': Korintotewe'sxa' pu'çxya' ih ũsta' jîth txā' îsxiini yuumeena. I'kwe'sxa' kxtey yuukahnthu txā'jî'. 4 Txā'wême', Macedoniajūwe'sx maáia' adx yakh ja'datey yuusa' i'kwe'sx kxtey yuumeé ũsiyna kpaakitxna, aça' wala thaame yuhna i'kwe'sx txakwe wala pu'çxya' ũsta' jînis txā'wê kxtey yuumeete'. 5 Txāa sūhçxath naa yakthê'jwe'sxtxi yaçte kaajxa' yajkx i'kwe'sx tasxna, aça' txāawe'sx pa'jçxa' na'wê pu'çxwa'j pkhakhya' yajkx i'kwe txā'sa' pkhakh pu'çxna jxā'khan. Kxah i'kwe'sx wala pkhakhya' neeyūui'kwe txā'sa' ũçxhi'dxmée kāaja'jane'kwe, makwe peesweçxtewa. 6 I'kwe'sxa' peekx jii i'kwe: walamée mjiiite', ũ'wa wala meek kaseje'. Nawa wala mjiiite', ũ'wa txā'wêy walak kaseje'. 7 Teeçxsa na'wêçxah i'kwe'sx ũuste makwe peesweçxte', txā'sçxáa kxtey yuua'ja'. Wa'lna txā'wê yūuwa'jme', txāa pa'gatey Dxusa' peeygāja'k ũuste weçxana txā'wê peessa's. 8 Txā'wê yūute', Dxusa' peejimée ũsna nes yuuna i'kwe'sx peejini yu'sa' jxuka. Txajiiçxáa i'kwe'sxa' vxitesatxwa ũçxhi'dxmée wala pu'çxya' ājāne'kwe. 9 Txā'sna we'weçxak Dxus libroute na'jî':

Ji'phmeesatx wal'mée weçxana pu'çxsa's txã'wẽ ew yũupa'ga,  
Dxusa' peejxmée ũsna nes yuuna jĩ'k.

<sup>10</sup>Uuhwa'lj fxiwa's Dxusku ũsu', sa' txãa'fiçxáak kbuuçxa'ljna nuywalá'. Txãa pa'ga i'kwe'sxa' ũ'wa'lja's peejxmée jxuka uyçxa', vxitesatx peeswa'lja'swa wala uyuune'kwe. <sup>11</sup>Txã'wẽ yũute', i'kwe'sxa' kījkihwa ji'phsa yuuçxa wa'l'mée pu'çxya' ājane'kwe. Aça' i'kwe'sx ũçxhi'dxmée peesya' pkhakhni's kwe'sx jxūna u'the', jxpa'gasa yakht'hē'jwe'sxa' Dxusa's weçxaatxna. <sup>12</sup>Na'wẽ yakht'hē'jwe'sxtxi pu'çxwa'lj kajaçtha'w txã' txãawe'sx peejinixá'a's selpiwa'jsame'. Txã'wẽ yũupa'ga txãawe'sxa' Dxusa's wala weçxakahn txã'wẽ pu'çxhiçtha'w. <sup>13</sup>Na'wẽ pu'çxnisa's txãawe'sxa' jxpa'gaçxa', Kristo jxkaahni's nwēese'jsa yuh yu'ta sūhna jiyutxna, txãasa Dxusa's tuuthe'ljna wala weçxaatxna, txã'wẽ i'kwe'sx wa'l'mée peesya' pkhakhçxa txãawe'sxtxi peesna vxitesatxwa peespa'ga. <sup>14</sup>Dxus pu'çxte i'kwe'sxa' txã'wẽ ew yũupa'ga, txãawe'sxa' iiméh wala weçxana Dxus yakh puutx we'wetxna i'kwe'sx pa'gate. <sup>15</sup>Dxusa's iiméh wala weçxa'tha'w txajx Nçxi'ka's yuu kwe'sxtxi peespa'ga.

#### Pablo juuna' jxkaahwa'lja's Kristo ũsni

**10** <sup>1</sup>Adxa' Kristo na'wẽy wala peeygāhna i'kwe'sxtxi we'we'th, adxa's açewe'wena na'jĩ'i'kwe txã'sna: Pablo' kwe'sx yakh ih ũsçxa yu' ma'jĩme'. Nawa jxu'lj txuteeyā'lçxa', wala juuna' we'wena jxkaaja'k jĩna i'kwe nuywe'we'. <sup>2</sup>Adx i'kwe'sx tasxte pa'lçxa maafĩtxi's juuna' yuukahmen, adxa's nuywe'wenuwe, txã'wẽ Dxus jxthāasnime'sku juuna' jxkaaja' jĩna. Txã'wẽ nuywe'wesa yakh yu' puutx pdxi'puya'çxáa ũsthu maa yakhwa. <sup>3</sup>Adxa' i'kwe'sx na'wẽy nasaçxáa yuhth. Nawa adxa' naa kiwetewe'sx na'wẽ puiiya' ũsmeeth. <sup>4</sup>Kwe'sxa' naa kiwete puiinisa yakh pui'çmeetha'w. Dxus kaaũsuthel'jnisa yakht'a'w pui'. Txãasa ewmeesa yu'sa' makwe seena' walasatewa knaywa'lsatha'w. <sup>5</sup>Txãasatha'w knayu' Dxusa's jiyukahmen yupsa yu'sa' ma'wēsaxwa, kwe'sx ũus yaakxni yu'sa' nwēese'jmée, Kristo kaaũsuthel'jniçxá'stha'w kxtey yu' Kristo's nwēese'khan. <sup>6</sup>Sa' i'kwe'sx yu' ew yāl'j nwēese'thewa, maafĩ yu' nwēese'jmée ũsaxti's maatxwa kastigāyya'çxáa ũsthu.

<sup>7</sup>I'kwe'sxa' āakhēwe'sxçxá's i'kwe thegu', txã'wẽ maawa Kristo's selpisath sūhna yaakxsa', adxnawa txã'wẽy Kristo's selpisana sūhna yaakxwa'ljna. <sup>8</sup>Adxa' juuna' jxkaahwa'lsath jĩna we'wena nesthu yu', nawa txāl'jpa'ga thaamewa'lj yu' ji'phmeeth. Txãa pa'gatey Kristok txã'wẽ ivxiitumée wejxwa juuna' jxkaahna yu'kxpehwa'lja's adxna ũs, i'kwe'sxa' Dxus yakh çxhāçxha fxi'zekahn. <sup>9</sup>Aça' ũukhkahnku karta juuna' fxi'lçxa kaja' sūhna yaakxnuwe. <sup>10</sup>Sa' i'kwe'sx we'weçxa': Kartate yu' wala juuna' we'wena fxi'lja'k, nawa puutx pdxi'puçxa yu', jxkaahwa'lj yu'sa' āja'çme' jĩ'i'kwe. <sup>11</sup>Nawa txāl'jisa' jxpa'yakina, ma'wētka jxu'ju ũsçxa, juuna' we'wena karta kaja' na', txã'sa' kxtey yu'nja i'kwe'sx yakh puutx uyna pa'lçxa'.

<sup>12</sup>Wala mjiisatha'w jina weeçx we'wesa yakh kaaja'da'jna ùs wēemeeth. Txāawe'sxa' iiméh wala jiimeeta', txāasatx vxitesate thaakwe mjiisatha'w jina fxi'ze'. <sup>13</sup>Adxa' txāawe'sx na'wēy vxitee mjiinisú iweeçx we'wena fxi'zewa'lj jiphmeeth. Adxa's Dxus mtee pa'lj mjiina pekühwa'ja's ùsuna kxtee pa'lj mjiiwa'jsath. Txā'wēçxa íçxáath adxa's Dxus kaathe', i'kwe'sx tasxtewa pa'lj. <sup>14</sup>Txā'wē adx pekühwa'jmeesu yu' u'jmée ùsthu na', i'kwe'sx tasxsuwa adx pekühwa'jmeewaç yu', i'kwe'sx yakh ùsya' nyafxíi pa'jwa'jmée ne'tka yu'. Nawa i'kwe'sx tasxsu adx pa'jwa'kh yu', txāa pa'gath Kristo kaapiya'jni ewsa's i'kwe'sxtxi pta'sxya' adx nyafxte pa'lj. <sup>15</sup>Txāasa adxa' vxitee mjiini's iweeçx we'wena ùsmeeth. Txā'wē we'wemée wejxwa Dxus pu'çxte', jweeíçxáa i'kwe'sx yakh wala mjiiya' ája'nja, i'kwe'sxa' jweeíçxáa Dxusa's jiyukahn súju'th. Nawa Dxus mtee pa'lj mjiikaathe', kxtee pa'ljçxáa. <sup>16</sup>Txā'wē yūuçxa txāa e'su' vxite ahsuwa kaseje'nja Dxus yuwe ewte nvxiitwa'jsa's pta'sxna. Nawa vxitee mjiinisú yu' iweeçx we'wena u'kame'nja súju'th.

<sup>17</sup>Adxthu mjii jina we'wepkaçxte, wejxwa Dxusku mjii sühnaçxáa weçxana fxi'zewa'ja'. <sup>18</sup>Txāa pa'gately iweeçx we'wesa txā'wē Dxus dxi'pte ewsa kaseje'çme', naasáa Dxus we'weçxa txā' ewsa' jínisa yuuçxáa ewsa'.

### Kristo kaahnisatha'w jina ísxiina u'jusa

**11** <sup>1</sup>Adxa' i'kwe'sxtxi yu'kxpejxa' xsiigu'ne'thka, nawa txāatxi' mwantaíwe. Makwe ája'çmeewá'ntka, nawa áçxwa mwantaíwe. <sup>2</sup>Adxa' i'kwe'sxtxi' Kristo tasxu weh yuhwa txutee jxthāasu'çmeeth. Kna'sawa ma'wēga teeçxsa yakh yuuçxáa imi'çxa fxi'ze', txā'wēy i'kwe'sxtxi' Kristo yakh yuuçxáa kaafxí'ze'jya'th neeyü Dxus dxi'pte. <sup>3</sup>Nawa eçxthé'ja' nyafxíiwa ma'wēga Ewa's ísxii, txā'wēy áçxwa i'kwe'sxtxi's ísxiijawáana, aça' Kristo yakh txakwe ew fxi'zeççxawa txuteewá'kwe sühçxath üukhu'. <sup>4</sup>Txā'wē yaakxkahníi i'kwe'sxa' wa'lmée jxpa'gana üsi'kwe adx pta'sxi'th Kristo kaapiya'jni's txā'wémée fxiy pta'sxsatx. Sa' nyafxíi jxpa'gai'kwe Dxus Espiritu's txā'wémée fxiysanawa wa'lmée weçxana jxpa'gana üsi'kwe. Txā'wēy Dxus yuwe ewte nvxiitwa'jsa's nyafxíi wēse'ji'kwe txā'wémée fxiysatewa wa'lu'çmeei'kwe. <sup>5</sup>Txā'wē fxiy kaapiya'jsawe'sxa' Jesus jxkaahnisa walasatha'w jì'tx, nawa adxa' txāawe'sxte áhmeekwesa ne'tka súju'çmeeth. <sup>6</sup>Adxa' we'weya' yu' ájāçmeene'thka, nawa adx üuste yu' wala jiith. Txāasa íçxáath adxa' i'kwe'sxtxi' áate kaajiyu'ju' adx jiyuni's bagaçxtewa.

<sup>7</sup>Txā'wē i'kwe'sxtxi' kçxhāaçxha'jya' sühçxa, i'kwe'sx yuutxi's vxyuu pèjxmée adx vxyuu yaknthu fxi'ze' Dxus yuwe's pta'sxna. Sa' txā'wē yūuçxa', ewmeewá'ntka yuukx. <sup>8</sup>I'kwe'sx yuutxi' vxyuu thāasmée, wejxwa Dxus luuçx vxite ahsuwe'sx adxna peestxi txā'snath i'kwe'sx tasxte kaaselpi'ji'. <sup>9</sup>Sa' i'kwe'sx tasxte ùsçxa', adxa' peejiicxawa

i'kwe'sx yuutxi' maa yuhtxwa thãasmeeth. Adx peejini's Macedonijã yakhthê'jwe'sxtxi pees. Txã'wêth wala jxpa'yakx fxi'zena ũsu' i'kwe'sx yuutxi's maa yuhtxwa thãasmée, sa' i'kwe'sx yuutxi's thãasme'nja bagaçxtewa. <sup>10</sup>Adx ũuste isa yajkxçxa we'weni's Kristo' jiia', açà' Akayasuwe'sxa': Pablo' txã'wê vxyuu thãasku jïya' ãjãmeetxna. <sup>11</sup>Kwe'sxtxi ahçeçxak Pablo' txã'wê we'we' sũjuwá'kwe. Nawa txã'wê yũumée, i'kwe'sxtxi wala peeygãja'th txã'sa' Dxusa' jiia'.

<sup>12</sup>Nawa na'wêth vxyuu thãasu'çmée na' txã'wê yũuna nes yu'nja, adxwa ma'wêtkã kïhwa thãasmée Dxus yuwe's pta'sxna ũsu' açà' txã'wêy txãawe'sxwa kïhwa thãasmeetha'w jïya' ãjãmeetxna. <sup>13</sup>Txãawe'sxa' Jesus jxkaahnisatha'w jïna ãxiinisa's isasa na'wê we'wena u'jusaçxáata'. <sup>14</sup>Txã'wê yũuni's fxiy yuh yuune'ta sũhna yaakxwa'j jï'phmeetha'w, txãa pa'gatey eçxthê'j seena'sa yuhçxawa angel ewsa na'wê yuuççak vxya'. <sup>15</sup>Açà' kxahtx eçxthê'ja's selpisaawa txã'wêy ewmeesaçxawa ewsa na'wê yuuçxa vxya'. Nawa txã'wê ewmée yũuna fxi'zepa'ga vxituwa'ja's jï'phutxna.

### Kristo kaahnisa Pablo pxtaa yuuna fxi'zeni

<sup>16</sup>Adxa' na'jï'th na': Luukumeeth, nawa txã'wêtwewa luukuna sũhna yaakxsa yakh yu' luuku na'wêyçxáawa ki' we'weya'wath: ¿Adxçxáa kïh yũuçxa iwejçx yaakxwa'ja's jï'phmée yuuki'th? <sup>17</sup>Iwejçx we'wenisa' Kristo jxkaahnisameeta', naasáa luuku yuusáa we'wenisaçxáata'. Txãa pa'ga adxa' luuku yuusáa we'weniçxá's we'weya'wath. <sup>18</sup>Naa kiwetewe'sxçxá's jiiçxawa nakwe wala iwejçx yaaki'tx açà' adxwa iwejçx yaakxwa'j jï'phne'tka. <sup>19</sup>I'kwe'sxa' txakwe wala jïisatha'w sũju'i'kwe nawa luuku we'wesa yuutxi' jiyumeei'kwe nwêese'je'. <sup>20</sup>Txãasa i'kwe txãawe'sx juuna' kaaselpi'jini's wa'lu'çmée, ãxiçxa vxyuu kusa'ja'tx, sa' i'kwe'sxtxi iiyamuçxa ahçenatx jxpe'je' uyiina. <sup>21</sup>Nawa adxa' txã'wêy juuna' yuuya' ãjãmeetx, açà' thaame yuja' nawa pta'sxi'th.

Nawa vxite txã'wê yã'j iwejçx we'weçte', adxwa txã'wêy luuku we'weni's we'wewa'j jï'pthu. <sup>22</sup>Txãawe'sxa' hebreowe'sxtxna, açà' adxwa txãath. Israelwe'sxtxna, açà' adxwa txãaíçxáath. Abraham jï'jtxna, açà' adxwa txajújxwe'sxthu. <sup>23</sup>Kristo's selpiisaatha'w jï'tx, açà' adxa' txãawe'sxte wejx jxthaakwe selpiisath. Txã'wê iwejçx we'wenisa' luuku yuusáa we'weniçxá', nawa we'weçthu. Adxa' txãawe'sxte jxthaakwe mjïisath, txãawe'sxte jxthaakwe pkxuunisath, karcelte maazkuée uswa kxuuphnisath, maazkuée uswa uuwa'theçxáa yã'j fxi'zesath. <sup>24</sup>Adxa's judiwe'sxa' tahç us kastigãyçxa' treinta y nwewe ãhpkaçtxti peçxujkwe. <sup>25</sup>Tekh usthu pãpani yuu. Teeçx ente' kwet wãatatahçxa ikhe'dxihtx. Tekh usku adx u'jni barko' ãkh dxiikhê khêe. Vxite ente' teeçx kus pe'te teen utath ãkhsu pehdna u'ju'. <sup>26</sup>Iiméh wala pekũsath, yu'wala seena'suwa ktejkana, peswée ikh wëni, adx nwe'sx íiwa ikh wëni,

maawa txã'wëy yũ wëeni. Çxhabsu ma'k yuu, meeçxa' dxi'the ma'k yuu, meeçxa' ikhte ma'k yuu, nawa txã'wëçxaçxáath ũukh ũukhte fxi'zena ũsu'. Yakhthê'jwe'sxtha'w jĩna ĩsxiisawa ikh wëeni yuuçxáath u'ju'.  
 27Mjĩina nxusteth fxi'ze!. Maazkuëe kuswa dehmeeth u'juwa'j ji'phu', pxttaa wëena, yũ'wëena, ũ'wa'j uymée maazkuëe uswa u'ju'th, ropa ji'phmée kumana pxttaa yuuna.

28Txã'wë nxuste fxi'zenisaçxáatx ji'phumeeth. Dxus luuçx msuuwe'sxtxiwa jxuka peeygãhna yaakxwa'ja'swa een isath ji'phu.  
 29Maawa Dxus yakh çxhãçxhamée fxi'zeçte!, adx yuu txã'wë yuuç na'wëth yaaki! txãawe'sxtxi peeygãhna. Maaítxi's pkalte kweete'jeçte!, adx yuu txã'wë pkalte weteçç na'wëth yaaki! txãawe'sx pa'gate. 30Adxa' iiwejçx we'weya'waçxa', wejxwa adx pxttaa yuuna fxi'zeçte Dxus pu'çxku txã'sçxáana yaakxwa'j ji'pthu. 31Bagaçxtewa tuuthe'jni fxi'zewa'jsa kwe'sxtxi jxpe'jsa Jesukristo Tata' jiia' adx ĩsxiimée isa we'weni's. 32Vxite ente' adxa's na'wëtx yuu: Damasko çxhabte ũste!, Aretas jxkaahna ũsni kiwete ne'jwe'sxa' çxhabte u'kani vxitxte adxna tudwa'jsa txajk. 33Nawa adxa's kanastate akhçxa wentana muralxakhêtx spajkx. Txã'wë yũuçxath iyu ewmeesa kusejũ.

### Kristo kaavxya'ja'jni's uyni

**12** 1Peekíçxáa iiwejçx we'weni yakha' kĩh yuhwa ewsa ya'kutxi'ji'çme!, aça' wejx yuuwa Kristo kaavxya'ja'jni's uyniçxá's we'weya'wath. 2Katorce anxu yuuça' txãa ensu' teeçx piçthê'j Kristo's nwëese'jsa's tekh cielute kãhpkaxçx jxũna u'jni yuu txãa piçthê'ja's jiith. Txã'sa' petx kakwe ma'k jxũna u'jni yuu, meeçxa' kakwe ji'phmée ma'k jxũna u'jni yuu nawa Dxusçxáa jiina. 3Ma'wëne' yuu kakwe ji'ph ma'k jxũna u'jni yuu, meeçxa' ji'phmée ma'k jxũna u'jni yuu txãa yu'sa' jiimeeth, Dxusçxáa jiia!. 4Nawa jxũna u'jni yuh yuuk Dxus ũsnite pa'j. Aça' kxteea' we'weni wëse'kh, kim yuhnawa pta'sxwa'j meea's. 5Txã'wë yũunisaçxá' iiwejçx yajkxya' ya'ájayujuna. Nawa iiwejçx we'wena ũs wëemeeth, naasáa adx pxttaa yuuna fxi'zeniçxá's yaakxwa'j ji'pthu. 6Adx iiwejçx we'we wëewaç yu!, txã' ĩsxiinisamée yuh yuuna, txãa pa'gatey isasaçxá'sku ya'we'we' naa pa'ga. Nawa txã'wë yu' iiwejçx we'we'çmeeth, kxah maa yuhwa adxa's thaakwe walasana sũhna yajkxmeetxna adx fxi'zeni's uyna wëse'jçxawa.

7Txã'wë Kristo kaavxya'ja'jnisa' iiméh seena' wala zhiçxkwesa yu'k, aça' txãatx jiyuçxa adxa' iiwejçx yaakxwe'sxte, adx kakwete seena' wala akasa kaapa'ja'jnith yuu, eçxthê'j kaahnisa. 8Aça' Kristo's tekh uswa pëjxthu txãa aka's kaykase'khan. 9Nawa Kristo' na'wëçxáak pas: Peeygãhçxa adx pi'kxna ũsni wejx thaakwe ewsa!, txãa pa'gatey çxhãçxhameesafiçxáa adx pu'çxni's jxpa'gawa'jsata' jĩ'k. Txãa pa'gath weçxana fxi'ze!, aka yu' kasemeetewa, Kristo' adxa's peeygãhçxa pu'çxna



nes yuuna sũhna. <sup>10</sup>Txãa pa'ga adxa' wa'lu'çmeeth, çxhãçxhameekuẽ fxi'zeni, wẽesxuni, peejiina fxi'zeni, yahçena fxi'zeni, Kristo's selpiipa'ga thẽysa pa'ja'tx txãatx, txãa pa'gatey naa kakwete jwee fiçxãa nxuste çxhãçxhameekuẽ fxi'zeççxa yu', jwee fiçxãath Dxus yakh çxhãçxha fxi'ze'.

**Dxus yakh fxi'zesa Korintotewe'sx ewmeewãa  
fxi'zena ũstxna sũhçxa Pablo kuh yaakxni**

<sup>11</sup>Luuku na'wẽth peekiçxãa weeçx we'we, nawa i'kwe'sx jiyukahnku txã'wẽ we'wewa'j kaseh. Adxa' Dxus dxi'pte yu' àhmeekwesaçxawa, na'wẽ Jesus jxkaahnisa walasatha'w jĩ'tx txãawe'sxte yu' àhmeekwesameeth. Txãa pa'ga i'kwe'sxa' adx ju'gu yuuwa'jsa i'kwe yu'. <sup>12</sup>Txãasath adxa' i'kwe'sx ksxavxyte selpiina ũççxa, kĩhtewa wantãyna kījkihwa kaavxya'ja'th kim yuhwa ewunimeesa iiméh wala zhiççkwesatx. Txã'wẽ yũunisatx kaajiyu'jsa yu', adxa' i'sxiimée Jesus jxkaahnisatewa. <sup>13</sup>Dxus luuçx vxite ahsuwe'sxte thaakwe àhmeekwesamée i'kwe, nawa adxa' peeygãhçxath i'kwe'sxtxi's pu'çx thãasmée. Txã'wẽ i'kwe'sxtxi kĩhwa thãaspa'gamée jmpeltunaĩwe!

<sup>14</sup>Åçxha' i'kwe'sx tasxna pa'jya' yuuwa'ja's pheu'jçxa jipthu naa yakha' tekh us yujxa' yaakiçthu. Nawa i'kwe'sx yuutxi's thãasme'nja, txãa pa'gatey i'kwe'sx pu'çxwa'jsamée i'kwe, wejxwa i'kwe'sxtxi adx pu'çxwa'jsath ney na'wẽ. <sup>15</sup>Txãa pa'ga adx jiphuni yu'sa' jxuka ũsu'nja, adx itxĩ fxi'zeniyã'ljçxa, i'kwe'sx ũustxi vxitu jxthãasmeeçxa. Txã'wẽth adxa' i'kwe'sxtxi jweefiçxãa peeygãja', naapkaçxha' i'kwe'sx yu' adxa's jweefiçxãa i'kwe açe'.

<sup>16</sup>I'kwe'sxtxi adx kĩhwa thãassameete jiiçxawa, maafi yu' na'wẽ i'kwe we'we': Txã'wẽ àate yu' kĩhwa thãasmeeçxawa, ma'wẽ kutxi'jwa'ja'swa jiik yu', txãasaçxãak kĩhwa pẽjxmée jĩ'i'kwe. <sup>17</sup>Txã'jikahna', na'wẽ Tito yakh teeçx yakthê'j i'kwe'sx tasxna nyafççxah kaath, çtxagaçx wá'ntka i'kwe'sxtxi' i'sxiia' yajkççxa kaah? <sup>18</sup>Tito's i'kwe'sx tasxna nyafççxah kaja'ççxa, vxite yakthê'j kaapi'ki'jçxath kaah. ¿Txãn ente wá' Tito i'kwe'sxtxi i'sxii? Adxa' Tito yakh teeçxsa na'wẽçxah ew yajkxnaçxãa fxi'zesate ¿jiimeewá'kwe?

<sup>19</sup>Kwe'sx dxi'pte ewte neeyũu wẽeçxaxãak txã'lji' sũjuwá'kwe, nawa txã'wẽmeeth, wejxwa Dxus dxi'pteth we'we' Kristo jxkaahnixã's, kxah i'kwe'sxa' Dxus yakh jweefiçxãa çxhãçxha fxi'zewa'ja's uyuune'kwe, adx yakthê'jwe'sx yaakxnisa. <sup>20</sup>Txã'wẽme', i'kwe'sx tasxte pa'jçxa', adx jxkaahnime's wãa uyu'nja. Sa' peeygãhna pa'japkaçxte, juuna' yuuwa'j wãa kasejena sũhte ũukh yuja'. Txã'wẽ adx pa'ja'çte', i'kwe'sxa' puutx puiina, vxitee jiphunitx açeyajkxna, ũusaçxana, puutx txuteena, yuwe susna, e'sgaççãa açewe'wena, iwejçx yajkxna, ewmée wãa fxi'zena ũs yuune'kwe sũhtek ũukh yuh yu'. <sup>21</sup>Sa' i'kwe'sx tasxna yujxa'wath txãa

ente' i'kwe'sx pa'gate adxa' Dxus dxi'pte thaamewa'l' ji'phuwá'nja sūhçxa ũukhu'th. Txā'wē i'kwe'sx txakwe txaçxtewa pkal kazxsate íçxáa fxi'zena ũste uyna pa'jçxa', wala nxusna ũ'newa'l' ji'phu'nja sūhçxath txā'wē ũukh yaaki'.

### Yu'kxpehna yuwe weçxaa kaahni

**13** <sup>1</sup>Naa yakha' tekhn us i'kwe'sx tasxna pa'jya' yuuwa'ja's yaakiçthu. Kxtee pa'jçxa', kíh yuwe's pheu'ju'ççxawa, jiisa e'z meeçxawa tekhn txahçxa yuuwesa's kastigâywa'l' yuuna. <sup>2</sup>I'kwe'sx yakh kxtee nyafxíi ũsçxa', jxpa'yakx fxi'zekahn dxiikhëy we'weth pkalte fxi'zesatx maatxwa na'jina: I'kwe'sx tasxte ki'kin pa'jçxa', peltunaïme'nja jini's açxha' ki' kaayaki'jiçthu nee jxu'the ũsí. <sup>3</sup>I'kwe'sxa' adxa's jiyu wëena ũsi'kwe Kristo kaahnisa dxihetewa, txā'sa' adx pa'the jiyune'kwe. I'kwe'sx ähmée yūusatxi's Kristo' juuna'meeukuē jxkaja'çme', txāasa txajx juuna' jxkaahni's i'kwe'sx ksxavxyte kaavxya'ja'jya' ũsa'. <sup>4</sup>Txā' naa kiwete çxhāçxhameekuē fxi'zesa na'wē yuh kluuste fxuçni uuk, nawa ítxi yuuk seena' çxhāçxha yuuwa'ja's Dxus ũste. Adxwa txāa na'wëy naa kiwete çxhāçxhameekuē fxi'zeni's ji'phuçxawa, txāa yakh fxi'zeçxa', Dxus kçxhāçxha'jnith fxi'ze' i'kwe'sxtxi yu'kxpehwa'jsa.

<sup>5</sup>Txāa pa'ga çma'wē ũskxtha'w? sūhna meswe, aan Dxus yakh fxi'zena ũsne'kwe. İsxiiisamée Dxus luuçx dxihçxa', çJesukristo's ũuste ji'phkwe'? <sup>6</sup>Jesukristo's ũuste ji'phdxihçxa', adxa's ew jiyune'kwe, Dxus luuçxthu jina isath we'we' naa pa'ga. <sup>7</sup>Txāasath i'kwe'sx pa'gate Dxus yakh puutx we'we', kíhwa ewmée yūuna fxi'zekahmen. Adxa' İsxiiçxa txā'ji'çmeeth, naasáa i'kwe'sx ewçxáa fxi'ze jxthāasçxath txā'ji'. Adxa' İsxiiisa na'wē wá'ntka, nawa txāa yu' kíh yuumeena. <sup>8</sup>Txāa pa'gatey isasa's kxtey nwëese'jwa'jçxáa ji'pthu. <sup>9</sup>Dxus yakh i'kwe'sx çxhāçxha fxi'zeçte', adxa' weçxa'th. Adx yu' çxhāçxhameekuēçxawa, Dxus yakh puutx we'wena nes yu'nja, i'kwe'sxa' Dxus yakh çxhāçxha fxi'zeyá' äjākahn. <sup>10</sup>I'kwe'sx tasxna yuhmey, naa karta's fxi'jçxa yaçte kajaçthu, kxah adx pa'jçxa', i'kwe'sxtxi juuna' yuuwa'l' ji'phume'nja. Txā'wē juuna' yūuwa'ja's Kristok adxa's neewe'we, i'kwe'sxa' Dxus yakh txutemée jweeíçxáa çxhāçxha fxi'zewa'ja's ji'phukahn. I'kwe'sxtxi wejx yuuwa kçxhāçxha'jnath txā'wē yū'.

<sup>11</sup>Äçxha' yakhthē'jwe'sxtxi neewe'we'th ewçxáa fxi'zekahn. Kihetewa jxpubamée fxi'zewa'jçxá's mpaakwewe. Kvxiisxal'jni myūuwe. Kxteeçxah zhiçxkwe puiimée mfxi'zewe. Aça' ew kaafxi'ze'jsa Dxusa' i'kwe'sx yakh nes yuuna peeygāhna. <sup>12</sup>Ūsuh jxuka yajkçxça puutx teeçxsa na'wëçxah yuwe mweeçxawe. <sup>13</sup>Dxusa's jiisa yakhthē'jwe'sx jxukaysatx yuwe weçxaakaja'.

<sup>14</sup>Dxus yakhçxáa mfxi'zewe. Jesukristo pu'çxhina, Dxus Espiritu yakh txutemée fxi'zekahn.